

四庫全書

子部

欽定四庫全書

萬姓統譜卷三十一

明 凌迪知 撰

下平聲

三肴

包陽上黨羽音楚大夫申包胥之後以字為氏又望出丹

漢包咸

字子良會稽人客于東海為赤眉所得晨夜誦經自若賊異而遣之光武中興歸鄉里舉孝廉

除郎中入授太子論語累遷大鴻臚明帝即位以咸有師傅恩特加賜俸祿咸皆散與諸生之

者貧

隋包愷

東海人兄愉明五經愷悉傳其業大業中為國子博士于史記漢書尤稱精究學者以為宗教

授嘗數千人及卒門人為起墳立碣焉

唐包融

吳興人有才名制科擢第官至集賢學士與賀知章張旭張若虛齊名號吳中四士子何起居

舍人信刑部侍郎

包佶

字幼正韓洄盧貞李衡皆出劉晏門下唐貞元以來相繼掌天下財賦佶卧病詩寄劉長卿云

惟有貧兼病能令親愛疎歲時俱放過身世付空虛肌弱秋添絮頭風髮廢梳波瀾喧眾口藜

藿靜吾廬十年江海隅離恨不知余

宋包令儀

合肥人字肅之進士及第授朝散大夫分帥南京上護軍歷刑部侍郎大

包拯

字希仁令儀子舉進士嘗守鄉郡不少屈法以徇鄉曲吏事推為第一為御史時危言鯁論烈

如秋霜尹開封權貴斂迹推樞筦為名執政人以其笑比黃河清童稚婦女亦知其名京師語

曰闕節不到有閻羅包老卒謚孝肅有奏議十五卷

包纘

孝肅子奉議郎譚州通判政肅人號稱善治贈太常少卿

包天麟

字仁甫江陰人咸淳間舉博學宏詞科嘗註詩書易春秋年八十三手不釋卷二子植榘

俱登科

包恢

字宏父南城人世父約叔父遜從朱熹陸九淵學恢少為諸父門人嘉定中舉進士歷仕郡縣

所至破豪滑去奸利政聲赫然官至僉書樞密院事卒贈少保謚文肅

包整

涇縣人少嗜學好義家貯書為萬卷堂子三人  
泰明迪功郎泰亨充解泰南劍州劍浦縣丞兄

弟義聚八十餘年有靈芝  
產其堂人名其堂曰芝堂

包瑜

字希賢由舉人仕教諭致政歸淮王幣聘修書  
一時知遇進講便殿賜坐所著通鑑事類一百  
二十一卷左傳事類四十卷王閔之甚喜遂梓  
行於世居七年告歸投老林下撰韻府續編一  
百二十三卷春秋講義周易衍義讀史  
六事讀書備忘稽古齋集諸書藏于家

包鼎

宣州人以  
畫虎名家

金包長壽

臨洮人貞祐初與夏人戰有功賜姓烏庫哩  
累官至通遠軍節度使夏人嘗攻定西執其

弟世顯至城下謂長壽曰若不速  
降即殺汝弟長壽不顧奮戰破之

明包希魯

進賢人學問該博操行高潔門人受業必先德行而後文藝士習為之一新稱之曰忠文

先生所著有  
諾谷文集

包實夫

魯子力學明經事親至孝一日獨行忽遇虎銜其衣曳至林莽中實夫曰爾欲食吾肉吾

何憾念父母垂老缺終身之養虎知吾乎虎乃起復曳其衣至故處而去人以為孝誠所感

包卒

鄞縣人洪武開科進士

包懷德

蘭谿人永樂舉人刑部左侍郎

包原明

浙江臨海人宣德元年由舉人授南安縣學教諭學問淵深訓誨不倦時廟學頽壞有司

政弗及原明損資勸義修建一新職教事乃有政焉秩滿陞江西吉安教授

包裕

桂林人成化進士初任撫州推官  
仁恕公廉郡無冤獄時稱為小包

包義民

廣東合浦人弘治四年由進士為令質直敦厚不飾邊幅里人爭訟溫語解之有冰蘖之

聲陞廣信府同知

包澤

字民望鄞人弘治丙辰進士拜監察御史清戎陝西查理寧夏固原諸要害經畧整整及按湖

廣兢兢執法奏罷藩臬不職者勒王府侵田歸之民有系將趙昇甚權貴人嘗杖殺戍士奪民園舍顯貴人無敢發澤按之悉如法蕭儀賓連凌轢諸司王實為之窟澤按之數亡格憲非制也盡以聞王瞿然出連就獄所至望風解印綬去時太和宮巨璫齋性怙寵傲福聞澤按部輒戲其下曰毋縱閭羅包老擒汝矣已東雜出洞蠻難於遙制澤乃度地宜奏設九溪永定兵備諸

夷為之警服澤天性孝友操行介潔  
一時為名御史有東川政績十二卷

包溥

字民敬澤弟弘治庚戌進士授新泰知縣凡六  
年政成民安陞南京監察御史以風裁稱轉泉

州知府公門如水庭鮮滯訟明年入覲卒于傳  
舍平生廉潔自持衣不紈綺食不兼味敝廬數

間僻居委巷既其死也囊無十金惟遺  
圖書數卷敝衣數篋人稱包孝廉云

包沐

字民新澤弟少授尚書於澤既冠為郡諸生舉  
止端嚴動以禮自閑春秋祀學宮同事者或少

懈輒正色曰愛祝先師奈何不敬以貢授石埭  
訓導身率多士迪德振革各就鎔冶陞汜水教  
授

包梧

澤之子字子木生而穎異讀書過目輒不忘領  
嘉靖壬午鄉薦通判蘇州時織造中貴怙勢傲



視故事判庭糸梧獨長揖不屈諸額外取索裁革殆盡心銜之誣奏逮詔獄謫無為州同知未幾移成都府通判尋陞漳州同知漳瀕海盜藪長吏視為汎常弗問梧特設奇鉤致捕繫株連不遺餘力人情殊不帖意奪歸梧為文率奇詭雄俊自成一家言有白厓集澤孫大燿嘉靖己未進士

包鼎

字汝調嘉興人與弟御史鼎並舉進士鼎授兵部主事歷陞郎中乞改南部俱有聲績出知池州府為政務大體不事煩苛號為清簡郡中大治年未至遽乞休不問家人生產作業不入公庭日與呂太常憲遊歷山水為雅會鼎子太學生蚤世婦楊著奇節生二子曰節曰孝俱御史有介直聲

包節

字元達華亭人嘉靖中以監察御史出按湖廣

時初營顯陵設守備太監而廖武者頗專恣無忌節每事抑之斌不能堪遂誣劾節嘗騎馬過陵門不下詔逮繫遣戍卒于戍所士民冤之少

孤與弟侍御孝受母氏教甚嚴俱早成名

包汴

字元京嘉興人嘉靖己未進士歷叅議子樞芳嘉靖丙辰進士歷提學副使父子同舉于鄉一

時為盛事

包應麟

台州臨海人嘉靖進士

茅

東宮商音周公第三子茅叔封茅國子孫以國為氏又望出陳留晉陵

周茅濛

字初成咸陽人博學深鑒知周室將衰不求仕進歎曰生天地間者若天地之流電速也於是

師鬼谷先生授長生之術遂入華山修煉秦始皇三十九年九月庚子白日昇天先是邑人謠曰神仙得者茅初成駕龍上昇入太清時下玄州繫赤繩一云戲赤城繼業而往在我盈帝若學臘嘉平始皇聞之因改臘為嘉平玄孫盈固裏皆得仙居茅山

茅盈

盈之始祖言盈自華陽洞天徙自赤城

茅焦

齊人秦嫪毐之亂始皇遷太后于雍下令曰敢諫者死諫而死者二十七人齊客茅焦最後諫辭甚切直始皇悟母子復合如初

漢茅容

字季偉陳留人年四十餘耕於野避雨樹下衆皆夷踞容獨危坐愈恭郭泰見而異之因留寓宿旦日容殺雞為饌泰意謂為己設既而供母自以草蔬與客同飯泰起拜曰卿賢乎哉因勸

令學卒  
以成德

茅蘭

梁孝王臣說王  
乘布車入闕

茅孟敏

甌墮不顧勤學  
知名不應辟

唐

茅炳靈

陳留人  
大厯中登第工詩

宋

茅相

丹徒人慷慨有大志宋末急於用人以陸秀夫  
薦授兵部侍郎從之海上元兵勢逼同帝赴海  
死

茅革

全椒人仕為貴池令民有兄弟訟田者革為垂  
涕說同生當相盡以恩義兄弟感泣而去其後

革五子皆取科  
第以文學顯

茅無競

岳州參軍

茅彙征

字邦佑閩中人乾通四年解首淳熙進士

茅知至

仙遊人操尚介潔不求聞達築廬隱於縣之西下頻以六經教授鄉里蔡襄甚愛重之景祐中龐籍以德行薦補州學教授

有周詩義二十卷至性書三卷

茅信卿

泰州人四世同居舉家百餘口每旦家長坐堂上卑幼各以序立拱手聽命分任以事畢

則復命其有怠惰者執鞭辱之無有怨言雖和寒盛暑亦如之州守霍仲順聞于朝旌表其門

曰四世孝義之門

明茅成

定遠人國初勇將攻張士誠戰死于蘇州追封東海郡公

茅誦

字大方泰興人洪武間以儒士應辟典教本邑考績入朝高廟召對悅之擢秦府長史且勉以

董子輔相之業誦感知過益自奮激殫心輔導逾年秦國稱治因扁其堂曰希董以彰聖訓且著其志方先生孝孺為記稱其志意偉然不亢不諂有得於正誼明道之旨累官副都御史嘗偕大理丞彭與民拾遺朱逢吉輩道鄒謁孟廟詩有千古難忘義利辭之句又為詩寄淮南守將忠義激烈聞者壯之文廟繼統

速赴京師不屈而死時年五十四

茅惟揚

字維揚慈谿人資性峭深有智計永樂乙未進士初拜監察御史臺中奏疏及諸讞獄當

否皆出裁擇擢四川僉事轉河南副使四川按察使所至有廉名歸田之日囊無羨金

茅宰

字治卿山陰人由進士嘉靖九年任六合知縣時年方二十有七老成持重俾有定見人不得

窺其喜怒明敏果決有古循良風陞刑部主事以疾卒

巢彭城商音有巢氏之後封于巢子孫以國為氏又望出魯國

周巢父

因年老以樹為巢寢其上號曰巢父堯讓天下于巢父巢父曰君之牧天下猶予之牧犢無用

天下為莊子有樊仲父牽牛飲水見巢父洗耳驅牛而還恥令牛溷其下流也

巢牛臣

楚大夫

漢巢堪

章帝朝為太常時曾褒請著成漢禮堪言一世大典非褒所能定後拜司空

巢元芳

著病源

南巢倚

國子助教撰尚書義十卷尚書百釋三卷

唐巢尚之 中書舍人

宋巢安 上眉州人登科

巢寅 寶佑三年任通判揚州軍事

巢谷 字元脩眉山山人傳其父中學舉進士谷素多力棄其業學古兵法游西邊與河州將韓存寶善後存寶坐罪死谷逃避江淮間會赦乃出蘇軾蘇轍謫嶺海谷往循訪轍又欲往海南訪軾至新州病死轍聞哭之失聲曰谷於朋友之義無所不厚惜不遇稟子而前遇存寶後遇子兄弟也

明巢于翔 常州人任通判



巢筠

新昌人永樂貢士任御史

巢鳳

南海人成化舉人任威遠教諭

膠

商末賢人膠鬲之後

漢膠蒼

漢武時與朱買臣嚴助終軍司馬遷之倫皆辨知閭達溢于文詞

匏

漢

匏敏

山陽令

廬

音庖

周廬王

秦將軍

漢  
應宣

鈔  
見姓苑

明  
鈔秀  
正德  
舉人

鈔奇  
嘉靖  
舉人  
俱彰德人

鈔介  
字石嘉  
彰德人  
嘉靖  
癸丑進士  
任知府

抄

明  
抄思  
歸善人  
永  
樂舉人

交  
州名  
見姓苑

鄔 邑名見姓苑

濤 南郡見姓苑

艾 見姓苑

庖 見姓苑

萬姓統譜卷三十一

欽定四庫全書

萬姓統譜卷三十二

明 凌迪知 撰

下平聲

四豪

高 渤海齊太公六代孫文公子高孫僕以王父字為氏

周 高柴

衛人孔子弟子足不履影啟蟄不殺方長不折執親之喪泣血三年未嘗見齒避難而行不徑

不實孔子稱為愚著其為人智不足而厚有餘後世封共城侯

高固

南海人楚子滅越固以才能歸楚為威王相楚習於蠻夷惟事挑弧棘矢不復知有文事固相

之致霸諸侯以  
故文教日興

高漸離

燕人善擊筑同荆軻入秦刺秦王軻死漸離後以擊筑得幸置鉛筑中撲秦王不中誅之

高奚

高敬仲

見左傳

漢高彪

字子武無錫人舉孝廉第一除郎中校書東觀數奏賦頌奇文因事諷諫靈帝異之遷內黃令

卒有德政靈帝詔東觀畫彪像以勸學者

高相

沛人治易亡章句專說陰陽災異其學自言出于丁將軍

高詡

平原般人曾祖嘉以詩授元帝仕至上谷太守父容為光祿大夫詡以父任為郎世傳魯詩以

清操知名王莽篡位誦遂不  
仕光武即位徵拜大司農

高鳳

字文通葉縣人家世農業鳳頗精誦讀妻嘗曝  
麥于庭令鳳護雞時天暴雨鳳持竿誦經不覺

潦水流麥後為名儒教授西唐  
山中不應徵辟隱身漁釣而終

高賀

公孫賀故人揚弘之惡弘  
曰寧逢惡賓勿逢故人

高獲

汝南新息人游學京師與光武有素師事司徒  
歐陽歛歛下獄當斬獲帶鉄鎖詣闕為請光武  
謂曰朕欲用子宜改常性獲對曰臣受性於父  
母不可改之於今出則辭去三公爭辟不應獲

善天文道甲能役  
鬼神所言多驗

高頤

漢人與弟君實子文玉俱  
有才行一門三舉孝廉

高朕

蜀郡太守念文翁為政有法作石室以祀文翁其治蜀政績不說文翁

晉高柔

字文惠陳留圉人仕魏為管縣長奸吏聞其至皆引去累官廷尉封安國侯子光以文學行義

著仕晉累官散騎常侍進少傅

高岱

字孔文吳人少屬高操輕財貴義其友士拔奇取於未顯所交皆當時英偉年三十避難於餘

姚孫策與之左傳忌而害之

高崧

字茂琰謝萬為豫州都督崧為敘刑政之要數百言萬遂起坐呼其小字曰阿鄴故有才興邪

高史君

舊志逸其名建武中為嘉興監屯校尉領兵屯田鎮靜不擾歲遇豐稔公儲盈溢師中之

費一不煩民民思功德立廟祀之

高世衡

櫟陽令風教大洽獄無繫囚

南高允

字伯恭渤海衛人漢太傅褒之後少有奇度崔宏異之曰高子黃中內潤文明外照必為一代

偉器仕魏累官中書令爵咸陽公允雖寵貴家貧自如武帝嘗幸其第惟草屋數間布被緼袍

厨中鹽菜而已帝曰古人清貧豈有此耶如光祿大夫卒年九十八

高祐

字子集允從祖弟博涉經史好文字襟說性通放不拘小節仕魏累官中書侍郎孝文嘗問祐

比水旱不調何以止災祐曰旌賢佐政則災消穰至矣又問止盜之方曰須守宰貞良則盜賊

止矣孝文皆善之

高閭

漁陽雍奴人博通經史下筆成章魏自中書侍郎為中書令給事中凡詔令頌贊之類皆出其



手其文章與高允  
相上下時稱二高

高岳

洛人深沈有氣量嘗寓洛陽北齊神武每使入  
洛必止岳舍岳母山氏嘗夜起見神武室中無  
火有光詣卜者筮遇乾之大者占者曰貴不可  
言山氏歸報神武神武後起岳于信都封河清  
王

高昂

字叔曹祐從父弟翼之子性倣儻膽力過人龍  
唇豹頸姿態雄異聞莊帝遇害遂與父兄據信  
都齊神武至信都開門奉迎以戰功累官西南  
道大都督後與周文帝戰敗於芒陰死之神武  
聞之如喪肝膽

高勣

岳之子幼聰敏美風儀以仁孝聞襲爵清河改  
封樂安王性剛直有才幹甚為時人所重仕周

終洮州刺史豪猾屏迹路不拾遺在職數年稱為治理

高爽

廣陵人博學多才工屬文齊永明中舉孝廉先是劉清為晉陵令爽徑詣清不相接爽甚銜之俄而爽代清為令清迎贈甚厚爽受餽答書人問其故答云彼自餉晉陵令耳何關爽事

高謙之

遼東人專意經史而于天文算歷圖緯之書亦多該涉仕北齊行河陰令屢上疏論事多見施行

高恭之

謙之弟學涉經史所交皆名流雋士仕北齊為御史糾擿不避權豪帝姊壽陽公主犯清路恭之令卒破其車上

知其清直亦不責也

高琳

字季珉後加驃騎將軍周孝閔時討平文州氏師還京宴卿士賦詩言志琳詩末章云寄言寶

車騎為謝霍將軍何以  
報天子沙漠靜妖氛

高歡

渤海人元魏節閔時歡軍次信都封隆之開門  
以待遂入領冀州牧與隆之合謀抗表罪狀爾

朱兆與之  
戰大破之

高綽

字僧裕允子少孤恭敏自立身長八尺帶腰十  
圍沈雅有度量博涉經史稍遷洛陽令為政彊

直不避豪右  
京邑憚之

高澄

北齊定州刺史擒奸如神境  
內無盜政化為當時第一

隋高構

字孝基北海人仕為雍州司馬有能名徵拜吏  
部侍郎所舉杜如晦房玄齡等皆公輔器論者

謂有知  
人之鑒

高頴

字昭玄，衛人。父賓，郢州刺史。頴有器局，善詞令。文帝伐陳，頴為元帥，以功封齊國公。頴嘗為左

僕射，引進忠良，當朝將二十年。朝野推服，物無異議。論者以為真宰相。

唐

高儉

字士廉，勸之子。敏慧，有度量，觀書一見輒誦。武德中，為右庶子，進益州大都督。長史設條教，督勵風俗。又興學校，決渠溉田，入為吏部尚書。封許國公。右僕射儉三世居此官，世榮其貴。所著

有氏族志

高季輔

名馮，以字行。衛人居母喪，以孝聞。貞觀初，拜監察御史，彈劾不避權要。轉中書舍人，數上

書言得失。太宗賜鍾乳一劑，曰：「而進藥石之言，朕以藥石相報，後為吏部侍郎，善銓敘人物。」又賜金背鏡一面，其清鑒卒諡曰憲。

高履行

齊清河王岳之後也太宗時累遷洪州都督改永州刺史為政有名居母喪哀毀特甚太

宗諭使  
強食

高知周

晉陵人舉進士高宗時壽州刺史治尚文雅行所部先見諸生質經義及為政得失既及

錄訟考耕餉勤惰以為常  
累官同中書門下三品卒

高適

字達夫滄州人玄宗時舉有道科官至諫議大夫負氣敢言權近側目出為蜀彭刺史卒適尚

節義以功名自許政寬簡所莅人便之年五  
十始為詩即工每一篇已好事者輒傳布

高定

郢之子早辨慧七歲讀尚書至湯誓跪問父曰  
奈何以臣伐君郢曰應天順人對曰用命賞于

祖不用命戮于社是順人乎  
郢異之仕至京兆府參軍

高敏

京兆人舉明經拜趙州刺史聖歷初突厥圍之長史反應突厥敏與妻秦氏詐死虜與至突厥

突厥以金獅子帶紫袍示之曰降則拜官不降則死敏顧其妻妻曰酬國報恩正在今日遂瞑

目不言再宿虜殺之贈尚書諡曰節

高郢

字公楚衛州人九歲能屬文父伯祥為好疇尉安祿山將殺之郢尚幼解衣請貸賊併貸之寶

應初舉進士官至同平章事以右僕射致仕嘗掌制誥家無留稿或問之曰王言不可藏私家

高仲舒

通詁訓學擢明經開元初宋璟等嘗謂人曰欲知古事問高仲舒

今事問齊澣

高蟾

累舉不第作詩云天柱數修搆白日天門幾扇鎖明時陽春發處無根蒂須仗東風次第吹上

主司侍郎云天上碧桃和露種日邊紅杏倚雲栽芙蓉生在秋江上不向東風怨未開明年李

昭知舉及第

高霞寓

幽州人五世不異居以孝義聞嘗從高崇文擒劉闢有功拜彭州刺史

高瑀

瑀人少沈邃喜言兵嘗治陳蔡有善狀王沛死詔瑀領之自大厯後擇師悉出官人所輸貨巨

萬及瑀有命士相告曰韋處厚裴度作相天下無債帥瑀居官寬和無赫然譽所至稱治士人

懷之

高沐

馮之子貞元中進士以家託鄆故李師古辟署判官李師道據十二州叛沐引古今成敗勸說

不能入斥守濮州沐乃上書夸山東煮海之饒師道之謀悉露遂怒殺之及師道討平贈沐吏

部尚書

高崇文

幽州人七世不異居旌表門閭憲宗時崇文為左神策行營節度使劉闢以蜀叛卒討平之紀功于石子承簡為澠州刺史有惠政將吏立石頌功

高承簡

渤海人以父崇文平蜀功除嘉王傅裴度奏署牙將平蔡摧汲州刺史遷邢州徙義成軍檢校尚書左僕射有治能將吏奏狀朝廷數賜璽書褒寵之敕崔鄬撰文立石頌功見宋訥東

郡志

高重

字文明清河人歷同門下郎中敬宗朝置侍講學士重以簡厚博雅與崔鄬被選再擢國子祭酒文宗命釋左氏春秋刊定九經復出為鄂岳觀察使以善政被褒久之徵拜太子賓客



高元裕

字景圭渤海郡公性勤約通經術敏於為吏嚴嚴有風

采自侍講為中丞文宗難其代元裕表言兄少逸才可任因命之少逸既代稍遷給事中出為

陝號觀察使後以兵部尚書致仕

高湘

字濬之渤海人試宏辭以詩文知名咸通末為諫議大夫湘莅事精嚴自持益重終戶部侍郎

高駢

字千里懿宗時事朱叔明為司馬有二鵬並飛駢曰我且貴當中之一發貫二鵬馬衆大驚號

落雕侍御

高仁厚

中和初以西川牙將討賊凡出軍六日五賊皆平拜眉州防禦使

五代高季興

陝西硤石人梁初拜荆南節度使始至江陵一城而已季興招輯綏撫未帝封為渤海王

唐初封南平王子從誨封渤海王孫  
保融封南平王子繼冲立歸于宋

高乾

本燕人李景據江南潛結契丹歲遣單使往復  
乾父霸將契丹命以乾從行使景方至江左謀

間北使與中夏構隙遂殺霸居乾濠州乾在濠  
生三子尋挈族歸宋給田亳州蒙城因土著焉

高彥

字子奇海鹽人事吳越錢氏屢從征伐有顯功  
及錢鏐立奏授彥湖州刺史彥性淳厚居職十

餘年政甚簡便後  
奏領費州刺史

高頔

雍邱人後唐進士累官天雄軍掌書記以左補  
闕致仕頔有清節力學強記晨暮嘗拱手危坐

未嘗少懈子南金宋雍熙初擢  
第次子鼎舉進士官至殿中丞

宋

高懷德

真定常山人周天平節度行周之子個儻武  
勇性簡率不拘小節嘗從周世宗討北漢南

唐皆克捷累官侍衛馬軍都指揮使宋初從太祖征澤潞及揚州以功加同平章事太宗時封

冀國公

高彥暉

漁陽人仕周為耀階二州刺史太祖時從王師伐蜀為歸州路先鋒金師雄作亂彥暉討

之力戰而死太祖聞而痛惜之

高防

壽陽人性沈厚守禮法累世將家父從慶成天并闕與梁軍戰死防好學善為詩事漢入宋官

至樞密直學士知鳳翔府及卒太祖甚悼惜之

高弁

字公儀濮州雷澤人從种放及柳開學至道中舉進士累官御史諫脩玉清昭應宮降知廣濟

軍弁性孝友為文章多祖六經及孟子有帝則三篇

高瓊

涿州人乾之子少勇鷙太宗召至帳下及即位推御龍直指揮使積戰功累官保大軍節度鎮

高化

州都部署真宗時為并代都部署有政績終檢校太尉瓊不識字而曉達軍政善訓諸子真定人沈勇善射真宗為襄王尹京兆命巡八廂積獲奸盜甚衆盜有遺化金帛者俱弗受遷

武安軍節度使知相州部有大獄已具化疑而訊之出無罪者數人卒贈太尉諡恭壯

高繼勳

瓊子真宗時為益州兵馬都監歷知數州累遷建雄軍節度使繼勳性謙謹有機畧善撫

御士卒在蜀有威名子遵甫官至北作坊副使遵甫女為英宗皇后神宗即位追封繼勳康王

遵甫亦追封楚王

高若訥

字敏之榆次人徙衛州進士及第累官樞密使皇祐中罷為觀文殿學士尚書左丞卒諡

文莊若訥強學善記該通羣籍  
頗明歷學醫書有文集二十卷

高賦

字正臣中山人舉進士知真定縣通判成德軍  
嘗知衡州捕絕蟲毒及知唐州相其曠原沃壤

募流民以耕戶口稅賦增至數倍  
二州皆立生祠累遷集賢院學士

高永能

青澗人勇力善射種諤取綏州永能先驅入  
羅兀五戰皆捷後累進崇州團練使永樂之

役獻謀不用城陷戰而死永能撫部曲有恩遇  
敵則身先之下有傷者載以已副馬故能得士  
死力及死邊人無不痛惜

高敏

登州人為涇原指揮使歷利州都監數與西夏  
戰多所斬獲後以援兵不至中流矢卒贈嘉州

刺史錄其三子  
為侍監殿直

高永年

知西寧州時夏人寇涇原實刺薩哈勒兵逼城永年出禦之被執不屈而死

高懌

字文悅荆南人高季興四世孫十三能文通經史百家從种放受業知長安寇準薦不起及范

雍建京兆府學召懌講授諸生席間常數百人仁宗時命為大理評事固辭賜號安素處士

高頤

寧德人舉進士嘗語學者曰吾身任大責重無天地生物之功而有天地生物之心無經國子

民之位而有經國子民之志

高遵裕

秦鳳安撫副使王韶克復洮隴知鎮洮軍事以功遷神龍衛都指揮使歷知熙州

高量成

智昇五世孫段氏時為相退位築城于威楚優恤孤寡老幼風俗遂化稱為夷中之君子

子孫世有其地

高覲

字會之宿州新人舉進士為嘉興縣主簿通判泗州詔定南場茶法覲多所建明累官集賢院

學士進給事中知單州子秉梓州路轉運使

高遵惠

瓊之孫從王遵裕以戰功累官龍神都指揮使知熙州遵惠生以陰入官熙寧中試經義

中選累官戶部侍郎以龍圖閣學士知慶州方宣仁后臨朝繩檢族人一以法度乃舉家事付遵惠遵惠躬表率之人無間言

高允文

貴池人為清流主簿會里人張連嘗忤蔡京卒于客邸京欲檢視之允文力為保免京召

謂曰君高節尚義當加旌賞授定邊軍教授實黜之也後以汀州守罷歸家甚貧靜守無營時者稱長

高宗信

長樂人甫四歲能知孝讓及長凡所以事親者惟恐不至元豐四年里人直講陳烈以聞

遂以孝廉舉官  
金紫榮祿大夫

高荷

字子勉元祐中太學生與黃山谷往來谷與之詩有云寒爐餘幾火灰裏撥陰何與高元矩皆與江

西詩  
派

高漸

字善時萍鄉人熙寧末進士寧鄉尉論新法有行而未便或便而未盡善者凡十策帥何正臣

上之不便報調廣州錄事參軍建中靖國初入疏極言請正元祐元符二后君妾之分崇寧中以

上書編管撫州列黨碑大觀初預八寶赦與起居舍人黃庭堅等各敘復自便尋召之會卒

高閱

字仰宗鄞縣人八歲通經史大義弱冠登第高宗召為國子司業諭之曰太學興復欲得學問



淵深德行純正者為師表故以命卿  
官至禮部侍郎所著有春秋集傳

高文虎

字炳如閬中人紹興中進士累官中書舍人  
國子祭酒翰林學士文虎聞見博洽多識典

故嘗與脩國史後除華  
文閣學士知建寧府

高子孺

狄道人知龍州龕谷墓金人陷熙河子孺聞  
副總管劉維庸戰死力窮莫支先刃其家與

軍將韓清皆罵  
賊不屈而死

高元之

字端叔鄆人瓊七世孫建炎間衣冠南渡父  
寓籍明州因家焉家貧無書得易編口誦不

輟數日忘盥櫛隣士憐之稍借之書後受易春  
秋學于沙隨程迥時傳伯成為郡教授少許可  
折節與之交繇是鄉學者數百人師事之元之  
作變離騷九篇曰愍畸志曰臣薄才曰惜成曰

感回波曰力微曰危衷曰悲嬋娟曰古誦曰繹  
思行於世宋儒擬騷弗能及也集春秋說三百  
餘家號義宗悉本經旨凡百五十卷易詩論語  
後漢歷志解各一卷詩三千禱著五百號茶甘  
甲乙藁五上禮部卒不第將死  
手屬書樓鑰人號萬竹先生

### 高準

字平一寧德人隆興初丞相湯思退主和議太  
學生張觀等伏闕上書乞誅三賊準與焉乾道  
間虞允文當國獻東南銷患書一卷因請入北  
界伺敵虛實凡山川夷狄道理遠近郡邑兵賦  
强弱悉錄以獻并言恢復大要時允文已去國  
朝廷欲授以官準曰準之所以效命於虞相國  
者正以復九廟陵寢為念非為身  
計也拂袖歸西山之陽杜門不出

### 高曇

字子雲長溪人紹興末舉進士孝宗朝為太學  
博士奏疏言訓練土兵久任帥守上曰卿老成

歷練無高論以相詭譎其言皆可用翌日語宰執以為然遷祕書省著作郎兼皇孫平陽府教授再對便殿悉當上意既出退上目送之及門乃起嘗修乾道會要轉朝散郎有易說并詩文

二十卷

高稼

字南叔博極羣書為四川制置司參議官元兵入漢沔稼力戰却之後知沔州曰大丈夫不於城稼死焉贈龍圖閣直學士諡曰忠

高定子

稼之弟博通六經嘉泰初進士累官端明殿學士僉書樞密院事兼叅知政事嘗以忤史

高之謫官卒贈少保定子歷州縣所至以教化為先務

高商老

知宜興縣朱熹學記云商老之來躬為講說開之以性命道德之旨博之以詩書禮樂之

文使其士  
知所學

高世則

以節度使判温州所得俸祿積二萬緡請以  
裨郡費當時皇族居溫者多恣橫世則以勲

戚重望鎮之  
民賴以安

高照

邵武人舉進士任虔州司理叅軍時郡有盜驅  
脅良民捕者利賞誣以真盜將論死照察其枉

出繫者  
百餘人

高談

光澤人言動由禮鄉人敬之紹定間旁郡盜起  
諸子請避談曰四方皆盜區無可避者及盜入

諸子又請談曰有廟社在將焉之盜至談出曰  
時和歲豐何忍為此盜執之脅使從談唾賊大

罵遂  
遇害

高登

字參光漳浦人為太學生靖康初與陳東等上書乞斬六賊廷臣建和議奪种師道李綱兵柄

登五上書不報紹興初廷對上疏萬言秦檜惡其譏已編管容州所著有東溪集學者稱為東

溪先生

高斯得

字不妄邛州蒲江人寶祐中為福建計度轉運副使朝廷行自實田斯得言按史記秦始

王三十一  
年而異日  
書之史冊  
自實田主  
上臨御適  
三十一  
謝方叔大  
媿即為之  
罷後以顯  
文閣待制  
知建寧府  
官至叅知  
政事以論  
賈似道誤  
國留夢炎

於是宋亡

高貴

祥符人寓丹徒宋末高郵知府後扈從之海上拜樞密使與陸秀夫同死於海

高應松

字貫畝長樂人開慶元年進士由衡州教授通判廣德軍召為國子監丞擢禮部員外郎

翰林院權直元兵至臨安挾宋降應松不肯草降表及元兵自湧金門入舉朝奔竄從官留者

九人應松其一也遷中書舍人直學士院尋擢工部侍郎進端明殿學士僉書樞密院事從瀛

國公至燕絕粒不語七日卒所著有貧畝策集郡邑並祀鄉賢

高彥儔

仕蜀守夔州宋師至勸其降彥儔曰吾今日止有死耳即具衣冠望西北再拜登樓縱火

焚自

金高仲振

遼東人博極羣書尤深于易及皇極經世書隱居嵩山安貧樂道足不涉城市山野小人

亦知敬之嘗終日燕坐所談皆世外事有扣之者輒不復語云

高守約

遼陽人太定中進士累官觀州刺史元兵徇河朔郭邦憲已降從至城下呼曰當計全家

室守約弗顧至再三守約厲聲曰吾不汝識也城破被執不屈而死贈官謚忠敬

高衍

遼陽渤海人敏而好學自少有能聲登進士第調遼陽丞世宗時為吏部尚書每季選人至部

託以檢閱舊籍久滯留衍三為吏部知其弊歲餘銓事修理選人便之子守義亦舉進士

高禎

遼陽人少好學雖甚暑未嘗解帶對妻孥如賓友嘗以尚書僕射判廣寧郡吏畏而民懷之入

為御史大夫以剛明自任官至太子太師

高霖

東平人太定中進士累遷國史院編修官論黃河之決當別開河以殺其勢從之官至兵部尚

書知政事中都留守兵亂死之謚文簡

元

高定

渾源人好學敦信尚氣節仕為雲中招討使都元帥永安軍節度使定謂諸子曰吾蒙國恩致

位侯伯布衣之極曷敢久貪爵寵子遂致仕而去

高睿

河西人年十六授符寶郎出入禁闥詳雅恭謹歷嘉興路總管浙西淮東廉訪使所至有政績兩為南臺御史中丞務持大體有儒者之風卒贈太傅謚貞簡子納麟官至太尉

高興

蔡州人少慷慨多大節力挽二石弓嘗步獵遇虎跳踉大吼發一矢斃之累立戰功官至右丞相謚武宣

高必達

建昌人五歲時父明大忽棄家遠遊莫知所之必達既長晝夜哀慕乃娶妻以養母而歷往四方求其父十餘年始得之黃州全真道院中學道三十年矣必達叩頭哀號乞歸父不得



已乃還家孝養  
篤至鄉里稱之

高明

姚安路總管天歷中入朝賜衣鳥楮幣明年盜起明招流離撫攜二閩污策還侵軼既乃繕官

舍葺郵傳定民賦峙軍儲父老咸自  
慶幸子壽官至雲南中書省左丞

高明

字則誠居崇儒里性聰敏自少以博學稱一日嘆曰人不專一經取第雖博奚為乃自奮讀春

秋識聖人大義屬文操筆立就一時名公卿皆慕與交登至正乙酉第授處州錄事數忤權貴

謝病去除福建行省都事道經慶元方氏竊據強留幕下力辭不從卧病卒所著有柔克齋集

二十卷今所傳琵琶記闕係風化實為詞曲之祖盛行于世弟誠字則明亦有文名時號高氏

難兩

高智耀

河西人世仕夏祖良惠為右丞相智耀登本國進士夏亡隱賀蘭山元太宗召見將用之

遠辭歸後入見憲宗言儒者宜蠲徭役世祖時又言儒術有補治道拜翰林學士遷西夏中興

等路提刑按察使卒追封寧國公諡文忠

明

高翼志

字士敏本蕭縣人元末寓居嘉興博學多文為鄮山書院山長洪武初徵脩元史入翰林

為編修陞侍講學士仕終太常少卿諡文忠

高復

臨邑人洪武初擢知長春府事為政有惠愛歲遭大旱齋于城隍祠禱之夜夢神告曰雨至矣

黎明果大雨歲遂登民歌頌其德改吉安府同知以老疾辭賜半祿瞻之卒敕葬上元縣

高啓

字季迪長洲人洪武初為編修與脩元史累官戶部侍郎致仕啟雋邁警敏有文武才書無不

讀光遂於羣史文雅淡有思致詩雄健渾涵自成一家所著有在鳴鳧藻等集行于世初與魏觀友善後觀得罪連坐死人皆寃之

高翼

棲霞人洪武中以才行卓異仕于朝累官至都察院左都御史體貌出衆人敬服之後命佐師

征雲南

高敏

安陽人由大學生擢禮科給事中處事公正官至大理寺左少卿

高復亨

字本中元時遊燕京從太史金華王餘慶學及遊學士歐陽玄諸名公之門洪武中詔為

總戎掌書記改知河間獻縣招集流亡百姓咸歌思之坐累謫鍾離未幾詔起官復知諸城諸城故密地密人廢學久復亨始至樹學延儒教化大行民喜而誦曰我有士子高侯文之我有

高岳

琴瑟高侯鼓之孰為干戈我則歌舞之孰為推  
埋我訓語之高侯毋舍我而去之尋以事免歸  
行臺御史中丞岳博洽有才華儀容秀整人望

高翔

而敬之工草書丹藥卜筮之術咸究識之洪武  
間薦知雲南縣免官寓家郡城又嘗寓魏塘云  
御史諸人有所論奏皆國家機要當上心經徵為監察

戮力戎事相與激發忠義永樂繼立召翔翔服  
喪服入見大哭語又不遜遂族翔沒其產諸給  
高氏產者皆加稅曰令世世罵翔也親戚悉成  
邊又發其先墓雜犬馬骨焚灰揚之而以其地

為漏  
澤園

高賢寧

濟陽儒學諸生也受學於教諭王省建文中  
貢為國子生北平兵攻濟南不下以箭射書

城中使巫降賢寧時在城中作周公輔成王論射城外請罷兵登極後被執文皇曰此作論秀才邪秀才好人命官之賢寧固辭其友紀綱時為錦衣指揮倖用事勸賢寧就職賢寧拒不聽曰君以軍旅發身余本書生食祿有年於義不可綱言於上得遣歸年九十七卒

高巍

字不危山西遼州人洪武中應貢授前軍都督府左斷事當建文即位兩上書不報使燕又上書燕王不報出監李景隆軍兵敗自拔南歸遇鐵鉉於臨邑相持慟哭共誓効死遂趨濟南守城拒靖難兵賦志喜有曰至濟南而被圍思張巡之忠堅幸遇知己之鐵相更從英輩以雲聯若徐將軍之赴赴盛統兵之桓桓僉憲高公之糾謨大叅宋公之周旋掠陣張都院之能勇給儲王太守之從權吾通王府校之論議斯文王肯播之勉旃衆資羣策屈力保全京城破魏縊

死驛舍

高斗南

字拱極徽州人體貌魁偉語聲若雷才識多敏慨然有志國初以薦授定遠知縣惠政多

方百姓歌咏九載滿去再留子恂博學多文知興州民愛戴如其父

高廷禮

初名揀字彥恢自號漫士長樂人永樂初與王恭皆自布衣召入翰林為待詔遷典籍初卒

廷禮事親孝謹與人交無賢愚新故益然如一博學能文尤長於詩書畫亦清雅時稱三絕所

著有唐詩品彙九十卷拾遺十卷唐詩正聲二十卷其詩有嘯臺集水天清氣集俱行于世

高穀

字世用興化人永樂進士選為庶吉士歷官翰林院侍講正統初楊士奇等以其學術醇正薦

為經筵講官預脩實錄屢典文衡歷陞工部尚書東閣大學士謚文義

高舉

字雲翰祥符人永樂進士兵科給事中持正不阿慷慨敢言以不合時解官歸其居不蔽風日

非衣惡食怡怡如也年九十餘而卒

高德

字孟升錢塘人性警敏日記數千言以文學薦授臨安縣儒學教諭陞高州府儒學教授

推為宗人府經歷纂脩永樂大典為副總裁官進講春官善屬文尤長於詩卒金臺寓舍所著有節菴集

高明

字上達江西人景泰進士授御史仕至右僉都御史請告不出明天性孝友俊暢有通才難進

易退出處皦然

高琬

字德資宜春人成化戊戌進士歷知松陽上海二縣治行為時第一推南京監察御史陞松江

高銓

字宗選江都人成化己丑進士仕至南京戶部尚書始入仕或勸增年以就科道亟謝不可歷

同都御史彭澤討平之豐書獎勵賜白金文綺召還將別用遂謝病歸年八十有五卒

名檢守松江俗尚侈靡身為儉約先之食不重肉客至魚鱸果脯一飯而已河南襄漢盜起琬

御史撫治勦陽琬器貌端重為政務達民事慎知府歷陝西湖廣叅政浙江左布政使右副都

還民中官怒脇以惡語執不變竟如銓議張秋河決上治河十二議巡撫保定時奸人獻民地為皇莊者銓奉命勘實以聞乃歸其地於民又立九則均徭之法民皆貼服為戶部改衛士康未折色每月分給著為令公性溫厚好禮家居雖鄉黨小吏來謁亦必公服迎送鄉人感之病



卒訃聞  
賜祭葬

高澐

字穎之江都人銓子性和平素以忠厚見稱初改翰林庶吉士授兵科給事中轉右給事中嘗

論寧藩請復護衛未幾叛逆人服其  
有徙薪先見陞南京光祿寺少卿卒

高瑤

閩縣人景泰舉人成化中任訓導上言宜進崇景帝不報歷番禺知縣為政先風化節財務義  
以身先之且廉公有威人不敢犯市舶常太監  
不法布政陳選盤出私貨諸司莫敢收瑤請以  
身當之遂籍其財權貴為之奪氣未幾選被韋  
誣被逮瑤亦落職束書數篋戴平頭巾飄然去  
士民涕泣送之者幾千人

高盾先

字世德宜章人成化進士授行人使朝鮮管  
伴來迎盾先曰朝鮮稱王受命天朝王不來

迎是與王人抗矣王謝罪來迎後遂為常陞御史發奸摘伏脩舉廢陞歷四川叅議卒先燕居如對賓客閨門如官府交友言必忠信見人患難必思急拯之故卒之日四方弔問如市云

高友璣

字肅政浙江樂清人由進士弘治間刑部郎中陞九江府知府持身謙謹剖事嚴明非國

計銖錢不歛非急務隻丁不差每飭戒僚衆通惠商賈而闌闌之貨經年絕無官衙之擾其他善政大率類此

高尚賢

字大賓釣州人正德庚午鄉試第一丁丑進士累官山東提學僉事以身為教士習翕然

向風遷光祿少卿子捷都御史拱大學士

高叔嗣

字子業祥符人嘉靖進士歷吏部郎中以忤時宰謝歸起補山西右叅政執法不阿赫然

有聲歷官湖廣按察使卒於官善學  
好古尤攻於詩有蘇門集若干卷

高第

字公次四川綿州人由甲戌進士出宰長洲歷  
南京吏部驗封郎中守寧波政舉大綱陞雲南

副使備兵臨安詰武安民樹百年之畫井井矣  
人方以公輔期之而亢志泉石遂拂衣而歸居  
常跌坐密室游神虛玄亦時時繹玩圖籍貫穿  
百家率能舉其旨要有請可詞翰者輒舒毫應  
之要皆大雅之音也間與當道縵紳談說時政  
若邊徼之險夷朝廷之紀綱都邑之錯列孰利  
當興孰弊當革一一如指掌薦  
剡屢膺而卒謝不起人多惜之

高儀

字子象錢塘人嘉靖進士歷官禮  
部尚書大學士贈少保諡文簡

高岱

字伯宗京山人嘉靖庚戌進士歷刑部郎中喜  
衣服垢同舍郎多誚之會主事董傳策張紳給

事中吳時來疏大學士嚴嵩父子不法狀詔逮繫司寇獄將寘重典岱請大司寇鄭曉輕之獄上成邊岱復為資裝微服送之出郊門嵩父子聞而銜之莫可為地會景王封風銓曹出為長史岱好讀先秦古文為唐人詩多論著性慙好面折人過失後以仕淹浮湛王門無所建白卒著鴻猷錄樵論楚漢餘談弟啟嘉靖丙辰進士舉鄉薦為皆有才名

曹 譙國角音顓頊玄孫陸終第五子為曹氏又文王第十二子振鐸封曹亦為曹氏

周 曹 剋 魯人以勇力聞莊公十年魯師與齊戰齊人三鼓剋曰可矣既克公問其故對曰夫戰勇氣也一鼓作氣再而衰三而竭彼竭我盈故克之

曹 邴 蔡人孔子弟子

曹洙

魯人以勇力事莊公為魯將齊人會盟于柯洙執匕首劫齊桓公盡歸魯之侵地

漢曹參

沛人秦時治獄掾佐高祖定天下戰功居多封平陽侯代何為丞相一遵何約東當時有載其

清靜民以寧一之歌卒謚懿

曹褒

字叔通魯國薛人父充治慶氏禮官至侍郎褒傳父業為博士朝廷欲置定禮樂拜為侍中褒

博物識古為儒者宗

曹邛生

字布名大著於天下者辨士曹邛生游揚之也

曹騰

字季興桓帝時封為費亭侯种嵩劾騰騰不為纖介嘗稱嵩能吏時人嗟美之种嵩後為司徒

告賓客曰今身為公乃曹侍郎力焉

曹曾

濟陰人光武時從歐陽歙受尚書積石為倉以藏書號曹氏書倉

曹充

魯國薛人習慶氏禮建武中為博士從守岱宗定封禪禮還受詔議立七郊三雍大射養老禮

儀明帝即位上言漢再受命自制禮以示百世拜侍中嘗作章句辨難於是遂有慶氏學

三曹植

字子建譙人操次子十餘歲善屬文操視其文曰汝倩人邪植跪曰言出為論下筆成章固當

面試余何倩人操甚異之植任性而行不自雕飾封陳王薨謚曰思

曹洪

字子廉曹操從弟也操起義兵討董卓至滎陽為卓將徐榮所敗操失馬賊追甚急洪下以馬

授操操辭讓洪曰天下可無洪不可無君遂步從到汴水水深不得渡洪循水得船與操俱濟

曹仁

操從弟也三軍服其勇封安平亭侯

曹弗興

吳人以畫名冠絕一時孫權命畫屏誤墨成蠅權疑其真以手彈之時美有八絕弗興與

焉

曹休

字文烈太祖曰此吾家千里駒

晉曹攄

諱國入調補臨淄令縣有寡婦姑勸令嫁適婦守節不移姑慙之密自殺親黨告婦殺姑攄知

其冤辨究得實時稱其明獄有死囚攄于歲夕放暫歸家刻日相率而還

北曹世表

魏人任清河太守有聲孝昌中齊反詔表持節慰諭摧尚書右丞湛僧珍陷豫州州人

劉獲鄭辯乘亂部兵內應命世表呼統軍雲寶曰湛僧賊衆彊諸將不敢戰世表呼統軍雲寶曰湛僧

珍所以敢深入為寇者以獲辯內應耳去僧珍八十里今出其不意一戰可破獲辯破僧珍自

走矣乃促令發軍日暮出城賊不  
意官軍卒至果破獲傳首京師

曹景宗

字子震新野人以膽勇聞頗愛書史每讀穰  
苴樂毅傳輒嘆息曰大丈夫當如是梁武帝

表為竟陵太守及帝起兵聚眾從之累功封  
湘西縣侯除郢州刺史加都督卒諡曰壯

唐

曹憲

初仕隋為秘書學士聚徒數百人譔苑珠叢又  
註廣雅唐太宗貞觀中揚州長史李襲譽薦之  
以弘文館學士召不至即家拜朝散大夫當世  
榮之帝嘗讀書有奇難字輒遣使者問憲憲具  
為音注援驗詳

復帝沾賞之

曹元

理善算術嘗詣陳廣漢設食甚薄漢曰有倉卒  
客無倉卒主人元理以匕著算曰俎上蒸純

厨中荔支何不  
設漢廣大驚



曹鄴

陽朔人。大中間舉進士累官至吏部侍郎。有詩名。

曹確

河南縣人。擢進士第。拜兵部侍郎。懿宗時同平章事。為人儒術深遽。器識方重。居位六年。出為

節度使

曹華

楚邱人。憲宗時拜沂兗海觀察使。身禮儒士。春秋祀孔子祠。立學官。講誦斥家貲佐贍。給人乃知教成。就諸生徙鎮義成軍。雖在戎伍而動必由禮愛。重士大夫。至廝豎必待以誠。信人以為難。

曹松

字夢徵。舒州人。光化中登第。時已七十餘矣。同榜五人皆年相上下。號五老榜。授校書郎而卒。

詩集  
所著有

五代曹信

仁和人唐末兵興保臨平鎮後移嘉興著惠政始城其地子圭嗣嘉興都將乾寧中淮人圍之

圭登樓張樂縱酒矢石交至晏如也卒興族人師魯固守寇不敢逼錢鏐壯其功授蘇州刺史

及卒嘉興民思慕之世祠祀焉

曹圭

仁和人家臨平少有膽氣唐末仕吳越為嘉興都將淮人圍嘉木圭與其族人師魯守之圭以

功授蘇州刺史子仲達性仁厚仕吳越累官至丞相卒諡安成師魯形短而多智人號曹晏嬰

曹仲達

圭之子生於臨平室有紫光少圭嘗節其飲食雖嚴冬尚未挾纊品膳悉與僕隸等又

日令運甓累授台處二州刺史元瓘襲封命仲達權知政事國建拜丞相佐嗣攝政事時大賚

諸軍有舉杖不受賜諸將不能制仲達諭之皆釋伏致拜性仁厚好施食不兼味卒諡安成

宋曹彬

字國華，靈壽人。父芸，成德軍節度使。彬初仕周，為引進使。宋太祖命為都監，伐蜀。蜀平，諸將多

收子，女玉帛彬囊中。惟圖書而已。及下江南，不妄戮一人。官至樞密使。太宗時，從征太原，封魯國公。彬清介廉謹，仁敬和厚，有功不伐，位兼將相，不以等威自異。為時良將，第一及卒，追封濟陽郡王。諡武惠。

曹利用

字用之，寧晉人。父諫，擢明經第。官至左補闕，利用慷慨有大志，揀補殿前承旨，再使契丹。

契丹求割地，力拒之。而止。後累官左僕射兼侍中，利用歷朝年久，忠蓋不渝。坐罪貶死。天下冤之。仁宗時追復官諡，哀悼。

曹翰

大名，人少為郡小吏，多知數飲酒，數斗不亂。仕周至樞密承旨。宋初，從太祖征澤潞及平江南。

太宗時又從下太原征幽州皆有功累遷左千牛衛上將軍

曹光實

字顯忠百丈人父疇蜀靜南軍使光實少武勇嗣父職遷永平節度管內捕盜遊奕使乾

德中賊黨羣行攻劫光實負母揮戈突圍得免後屢破賊有功太祖嘗稱為蜀中俊傑累遷都

巡檢使嘗擊賊於葭蘆川戰歿帝悼之官其四子

曹杲

真定人仕吳越為金華令平叛兵有功擢守婺後錢氏入朝委以國事杲即城隅浚三池曰湧

金既歿民德之立祠池上

曹矩

休寧人登景祐進士以純孝聞官至屯田郎中其任都官日久汝弼贈殿中丞燎黃之夕芝產

瑩光郡上其事詔以所居為忠孝鄉孝芝里孫夫死於方臘之難時稱為忠孝曹家

曹觀

字仲賓建安人皇祐中知封州儂賊入境或勸

觀避去觀曰吾守臣有死而已敢言避者斬乃

率兵禦賊兵潰為所執遇害妻聞觀死

曹靖

柳人性孝友嘉祐中為益陽令有美政去後民

思累官尚書比部郎知賓州黃庭堅為作善政

頌稱其御史嚴而不弛

殘使民寬而不弛

曹脩古

字述之建安人舉進士仁宗朝累官殿中侍

御史立朝慷慨有風節當劉太后臨朝權倖

用事而脩古遇事輒言

以忤太后出知興化軍

曹肅

字士先郴州人舉鄉薦初授通州寧遠簿平生

安分守道四方學者多從之游著述數千卷尤

攻於詩有騷人風子延祚字熙載清

修多學足不履城市卿士多出其門

曹脩睦

脩古弟性廉介自立與脩古同舉進士累官都官員外郎知邵武軍杜衍薦為侍御史改

司封員外郎知壽州徙泉州脩睦恬于仕進年五十一即致仕人以此賢之

曹觀

皇祐中知建昌軍李觀有詩送之云要知賢者善居官法自嚴明性自寬

曹璨

字韜光彬長子性沈毅習知韜畧能自奮勵以世其家累官富州刺史嘗為綏銀夏麟府等州

鈐轄善撫士卒威愛兼著契丹入寇屢戰有功後授同平章事卒謚武懿

曹瑋

字寶臣彬第三子沈勇有謀通春秋三傳李繼遷復叛彬薦瑋可將命知渭州時年十九舉措

如老成平居甚閒暇及師出多奇計神速不可測累樹戰功後拜簽書樞密院事出知萊青州

卒謚

武穆

曹琮

彬子歷官衛州團練使小謹畏終都指揮使

曹克明

知辰州有治狀撫水蠻叛徙宜融巡檢使蠻酋獻藥一器曰中藥箭者以是解之克明知

其詐令先試取藥箭刺箇股而飲以藥即死郡蠻慙懼而去

曹侑

字公伯韓王彬之孫累遷至同中書門下平章事加兼侍中封濟陽郡王神宗每咨訪以政然

退朝終日語不及公事帝謂大臣曰曹王雖用近親貴而端拱寡過善自保真純臣也

曹平

字公正仁宗光憲皇后從弟偕之子也以父任累官至温州防禦使哲宗光祐中提舉萬壽觀

可外樞密院白為真定路鈐轄善射左右手如一夜或滅燭能中伴契丹使者射雙破的客

驚悚

曹傳

宜春人元符三年與弟藻子遷同登進士名其堂曰三桂傳官至朝請郎知常州藻宣教郎知益陽縣事遷通直郎知郴州兄子邁崇寧中進士積官中奉大夫廣西運判直秘閣兼權安撫使

曹裕

字公善未陽人舉進士為潭州司錄參軍能辨枉獄後宰溧水值歲旱蝗漕使以歲計不足諷諸邑裕曰吾能忍視其死而不救乎卒以實聞

曹勛

陽翟人父組為睿思殿應制勛用恩補承信郎賜進士甲科累官太尉開府儀同三司卒贈少保勛從徽宗北遷復持御衣書歸進高宗崎嶇兵間稍著勞効故恩榮始終云

曹冠

東陽人博學強記紹興間進士遷太常博士後告老轉朝奉大夫賜金紫致仕年八十卒



曹輔

字載德沙縣人第進士為秘書正字時徽宗多微行輔上疏極諫太宰余深曰輔小官何敢言

大事輔對以大官不言故小官言之官有大小愛君之心則一遂編管彬州靖康初召還累官

簽書樞密院事張邦昌僭位脅輔視事遂奔濟州

曹粹中

字純老定海人宣和六年進士李莊簡公光堦秦檜在相位光時為參政檜知其名欲識

之粹中辭不赴竊語妻曰汝父必不能與丞相久處光謫貶海南粹中不復仕自號放齋有詩

說行於世

曹絳

字元象擢進士第與劉燾崔執柔劉正夫在大學號四傑秦少游曰置君詩少陵集中誰曰不

然有詩文號秋波集

曹建

餘干人乾道間從程迥陸九淵張栻游學有所見淳熙間朱熹過餘干見建與語大奇之建家

貧事母盡孝待弟姪盡友愛其卒也熹表其墓

曹組

字元龍淳熙六年從義郎知縣事組六舉不第著鐵硯篇以自見宣和中召見玉華閣上親灑

宸翰以賜之曰曹組文章之士嘗命題作賦援筆立就上大悅

曹彥約

字簡甫都昌人父興宗紹興間舉進士歷州縣有聲彥約天資穎異嘗從朱熹講學淳熙

間舉進士累官至兵部尚書平生以建立事功為務在朝多所建明卒謚文簡兄彥純弟彥繼子士況士哀士冕皆有時名

曹穎叔

亳州譙人進士及第累官右司郎中陝西都轉運使自慶厯鑄大鐵錢行陝西民盜鑄不

已穎叔請罷鑄諸郡鐵錢以三鐵錢當銅錢之一從之進龍圖閣學士知永興軍

曹叔遠

字器遠瑞安人少學于陳傳良年十九以春秋魁鄉薦登紹熙第久之李壁薦為國子錄

忤韓侂冑罷通判涪州歷四川度節後守遂寧營卒莫簡苦餉臣侵刻因稱亂勢鴟張甚入遂寧

境輒戢其徒無肆暴曰此江南好官員也入朝為工部郎出知袁州以太常少卿召除權禮部

郎遇事獻替多所裨益終徽猷閣待制謚文肅嘗編永嘉譜識者謂有史才今行於世

曹寔

字宗山第進士仕至朝奉郎志在及物以江陰故廢郡屬毗陵舊無產稅則例民輸下鹽錢視

他縣獨倍力請均之郡從其請邑人皆德之所著有苕溪集鍾山集抱關前集論語註十篇

曹炬

字巨山第進士自京口分教受知於節使李寶辟真幕府移檄山東皆其文也詞氣激烈軍中

感動特授左宣教  
郎終饒州通判

曹訓

字子序自章貢移知袁州每事奉法鋤姦戢吏亦不少恕屬邑萬載有豪戶十武斷鄉曲不輸王賦物色得之盡繩以法總倉二司委郡和糴訓曰袁之和糴蓋屢免矣一旦開病民之端訓之罪也祈懇切至竟得免將滿除直閣知閬州

曹幽

字西士叔遠族子嘉泰初進士為左司諫與王萬郭磊卿徐清叟俱負直聲時號嘉熙四諫遷吏部侍郎不拜以寶章閣待制致仕卒謚文恭子愉老亦登進士第

曹錫

宜黃人嘉定進士性剛直文典雅歷官至屯田郎奏對推廣真德秀祈天永命敬德愛民之說奉祠歸德秀嘗謂其文采可為辭語剛直宜在言路明敏可作監司

曹友聞

彬十二世孫少有大志寶慶進士知沔州元兵入興元友聞馳至難冠山隘與敵殊死戰

及弟萬俱死之事聞贈龍圖閣學士賜廟褒忠諡曰節

曹悅

字習之幼歲痛其父歿絕葷酒婚宦刻志問學五經有解後學問難疊疊不倦爾答從故家借

書輒請書目一閱即能言其本末平生無喜愠嘗戒學子絕人我則天理自著為易解全書分

辭變象占學者尊為泰宇居

士詩文三十卷精潔可傳

曹琦

知南平軍元兵來攻被執脫身南歸制置辟主管機宜文字聞都統趙安以城降就守禦地自

死經

曹經

字清甫休寧人幼穎悟八歲能通誦五經咸淳戊戌殿試丙科授迪功郎昌化縣主簿博學知

名撰文獻通考癸酉克信州考試官甲戌赴昌  
化簿任尋轉修職郎乙亥權知縣事元至元戊  
寅授紫陽書院乙卯以壽終年八十有二所著  
有講議四卷書藁文藁韻藁各五卷餘如  
服膺錄讀書記雜作管見三場管見泣血錄過  
庭錄課餘雜記曹氏家錄古文選等書藏于家  
子希文能著書有詩文講義  
二卷通鑑日纂二十四卷

### 曹植孫

字德堅瑞安人自少工舉子業下筆閎肆諸  
老咸咸器之母舅兩科林雅誨以文法宜多

采左氏及戰國語嘗自謂曰作文譬如立萬人  
場中非劇然大罵而鳴人肯聽我乎宋亡室廬  
燬于兵遂寓平陽梅溪以古文及詩自娛凡一  
篇出人輒傳誦後留安陽十餘年南北生徒數  
百人壽八十有七  
終延祐鄉貢首科

元

曹鑑

宛平人累官禮部尚書在官三十餘年以清介見稱天性純孝通五經為詩賦尚騷雅為文法

西漢每篇成學者爭相傳誦

曹珏

字子玉滄陽人資重篤實徙居方城二十年以教授為業方城人有倉卒避吏留一篋而去年餘事定其人復來驗篋封識不動正大末以文行徵復居襄溪號罷罷老人

曹珪

徐州人泰定中州人江志作亂珪子弼在賊黨中珪謀誅志并弼殺之金主詔云珪赤心為國大義滅親特進三官于正班用之

曹伯啟

碭山人弱冠從東平李謙游篤于學問累官集賢學士侍御史泰定初致仕伯啟性莊肅奉身清約在中臺所獎借名士甚多六子十孫皆顯仕

曹彥可

亳州人至正間妖賊起里中皆不知書者羣趨彥可家以刀斧迫之寫旗彥可唾曰我儒

者知有君父寧死耳豈為汝寫旗者邪遂遇害事聞謚節愍

明

曹良臣

安豐人國初率所部來附從大軍取河北其功居多從徐達擊敗王保保于西定封宣寧

侯後與敵戰歿封安國公謚忠壯

曹體仁

洪武間東平知州廉慎公平教民以禮讓撫字有方嘗有詩曰三年短髮憂民白一寸忠

心為國丹去後民猶思之

曹孔章

字子文父伯淵字子澄有至行仕元為武康教諭孔章少聰慧五經百氏子史無不究覽

洪武初以明經薦為烏程縣學教諭遷湖州府學教授聘典江西文衡學者多宗之詩文簡古



曹銘

會寧人永樂進士任兵科給事中

曹弘

字文淵益陽人永樂乙未進士歷刑部員外郎恭慎潔清詳識明允累遷刑部右侍郎巡撫淮

南鎮靜不擾軍民懷之卒于官篋中無長物惟衣二襲帶二束而已

曹義

字子宜句容人永樂乙未進士授翰林編修官至南京吏部尚書乞致仕平生端謹至屬續猶

肅然卒賜祭葬

曹銘

新野人以進士授香河知縣上疏諫言宋儒胡瑗等八人皆有功道學當從祀孔子廟廷上賜

允行之尋陞儋州知州卒祀鄉賢祠

曹庭訓

靈寶人性資聰敏處事果決鄉里曲直悉求判正洪武間以人才薦授應天府尹

曹義

儀真人宣德正統中以都督鎮守遼東有邊功進封豐潤伯謚莊武

曹鼎

字萬鍾寧晉人初以鄉舉歷代州學官改泰和典史宣德擢進士第一授翰林院修撰陞侍講

入內閣典制日侍講讀累陞吏部左侍郎兼文淵閣大學士正統間隨征沒于軍中贈太傅謚

文忠官其子孫鼎學贍行端內剛外和識達政體才智出人士林重之

曹凱

益都人正統間進士授給事中彈劾不避權勢聞英廟北狩率言官於闕門執嬖倖壞事者陽

殺之

曹霖

字濟民任浙江都司副斷事素以剛明廉介見稱藩司信任委抽分毫末不涉及考績囊橐一

空陞山西蒲州同知卒于都下人皆憫其清苦祀八鄉賢

曹端

字正夫，澠池人。端重有守，潛心經書，尤好性理之學。永樂初，鄉舉任山西蒲霍二州學正，嚴立

教條，講授不倦。其教人，每以踐履為主，後生多所成就。號月川先生。所著有四書詳說及太極

圖解

等書

曹昌

字德隆，壽州人。父斌有隱志，好遊覽山水，往來汴洛久而不歸。去時，昌甫三歲，及長，辭母求父。

跋涉三年，知父已死，朝夕號泣，水漿不入口。周王賜孝子詩，已而負骸骨歸鄉。人稱為曹孝子。

曹誥

字仲文，湖廣黃岡人。第進士，由南京刑部郎中嘉靖十六年來守安慶。沈毅質厚，不事浮躁，厲

精民事，洞悉閭閻困悴之狀，每施令，布政惟恐傷之。訊刺鞠斷，尤所留心。凡大小獄，須訊鞠者，

則備閱成案，參稽虛實，而後訊之。即纖細不以委諸胥史，亦未嘗有所誰何。日午則飯堂上，亦

止啖蔬素而已薄暝退休日以為常其所論次  
無弗當於情者際飲燕率從菲節或以簡傲譏  
焉

曹邦輔

定陶人由進士嘉靖間任元城尹居官以正  
大寬平為務操持廉潔胥吏憚之如神節省

里甲之費歲數千計時穉方多故當道促辦軍

器甚棘悉以公帑羨餘給之毫髮無取于民歲

值飢饉眼貸有法民賴以全活遭外艱號泣徒

跣數百里邑民哀傷之追奠于其家者數百人


其得民心如此歷官巡撫都御史以事

被逮隆慶中歷南京戶部尚書致仕卒

曹亨

字伯貞新鄭縣人嘉靖戊戌進士南京工部尚書

尚書致仕卒



萬姓統譜卷三十二

# 欽定四庫全書

子部

萬姓統譜卷三十三至三十六

詳校官中書臣徐志晉

主事臣祁韻士覆勘

總校官知縣臣楊懋珩

校對官中書臣王家賓

謄錄監生臣朱學濂

欽定四庫全書

萬姓統譜卷三十三

明 凌迪知 撰

下平聲

四豪

陶

濟陽徵音陶唐氏之後大虞惠為周陶正以官為氏又望出丹陽壽陽

周

陶谷子

為大夫治陶三年名譽不興家產三倍其妻諫之曰能薄而官大是謂家害無功而家昌

是謂積殃今夫子貪富圖大妾聞南山有玄豹

霧雨七日而不下食者何也欲以澤其毛衣而

成其文章耳

故藏以避害

陶叔周

司徒司

陶開

功臣封侯

陶青

丞相丞

陶敷

字文理京縣人拜司空

漢陶謙

字恭祖丹陽人以諸生四遷為司馬西討邊章尋刺徐州擊黃巾大破之境內晏然時董卓雖

誅而關內未平四方斷絕謙每遣使問行奉貢西京遷徐州牧加安東將軍封溧陽侯

陶基

謙從子仕吳為交州刺史子璜亦刺交州晉平吳復其本職封宛陵侯改為冠軍將軍在交州

三十年威恩著于殊俗及卒舉州號哭如喪慈親



三陶璜

字世英吳丹縣秣陵人刺史交州周窮好施能得人心

陶回

丹陽人父抗吳太子中庶子回有器幹王導引為司馬蘇峻反王師敗績回收合義軍與陶侃

溫嶠并力攻峻以功累遷河興太守開倉賑饑一境獲全卒謚曰威四子汪陋隱無忌咸有幹用

晉陶汪

宣城內史招隱逸開學校民知向方

陶侃

字士衡鄱陽人徙家潯陽父丹吳揚武將軍侃歷樅陽武岡令有能名後以功封東鄉侯遷江

夏太守元帝時累廣州刺史在州無事朝暮運百甓以自勵後平王敦蘇峻皆有功拜太尉封

長沙公二子俱死節贈大鴻臚與贈長沙守

陶瞻

字道貞少有才器侃長子歷廣陵相廬江建昌守散騎常侍都亭侯蘇峻叛死之追贈太鴻臚

諡愍悼

陶範

侃中子最知名官至光祿勳

陶臻

字彥遐侃兄子有勇畧賜壽陽亭侯追贈平南將軍諡肅

陶輿

侃中子累以戰功遷武威將軍與杜弢戰率輕舸出上流擊之賊望見輿軍驚曰且避陶武威

後戰死詔贈長沙太守

陶淡

潯陽人侃之孫幼孤好導養之術年十五六便服食絕穀家累千金僮客百數淡終日端拱曾

不營問頗好讀易善卜筮後逃隱山中不知所終

陶潛

字元亮在晉名淵明在宋名潛世號靖節先生

號五柳先生後起為州祭酒尋自解歸再起知

彭澤縣會郡遣督郵至縣吏白應束帶見之潛

歎曰吾不能為五斗米折腰見鄉里小兒即解

印去賦歸去來辭以見意及宋受禪劉裕屢徵

不就惟賦詩飲酒以終其身有詩集行世

終其身有詩集行世

南  
北  
陶季直

秣陵人祖愨祖劉宋廣州刺史父景仁中散

大夫季直好學淡于榮利仕齊為尚書比部

郎累遷給事黃門侍郎素清苦及死家

徒四壁子孫無以殯殮所作有京都記

陶弘景

字通明秣陵人讀書萬卷齊高帝引為諸王

侍讀永明中掛冠神武門去居句曲山立館

自號華陽隱士梁武帝早與之遊即位徵之

陶籍

字文海弘景子仕齊為餘杭令政化如神善于摘伏下莫能欺好學有才氣為詩類謝靈運時

人咸謂康樂之有陶籍如仲尼之有邱明老聃之有莊周

陶子

字海育父延仕宋為尚書比部郎兄尚宋末為倖臣所怨被繫子鋸公私緣訢流血稽顙

行路嗟傷逢謝超宗下車相訪回入縣詣建康令勞彥遠曰豈忍見人昆季如此而不留心勞

感之兄得釋

隋陶世謨

京兆人仁壽初為嵐州司馬注措有方惠澤下究會漢王諒作亂刺史喬鍾葵發兵將赴

逆謨以義拒之葵挾以兵謨辭氣不撓葵義而釋之

唐陶大舉

當塗人武后時為宣州刺史徐敬業反大舉與戰敗之轉懷州刺史吏民思之為立德政

碑

陶沔

竹溪六逸中人

陶詳

為校書郎隱居陽羨方于有題陶詳隱居詩

陶翰

潤州人開元中為禮部員外郎

陶峴

淵明後開元中居崑山放遊江湖數年不歸文學可以經濟不謀官達郡邑招延不肯來自謂

麋鹿野人吳越之士號為水仙

五代陶雅

合肥人楊行密用為將討定鄉盜後為江南都招討使歎聲衝睦四州都團練觀察使處置等使

陶穀

字秀實新平人祖彥謙有詩名歷三州刺史父

士宋興歷禮刑戶三部尚書遷學士承旨

宋

陶居仁

燕湖人以行義聞州里仕為鎮江錄事叅軍

元兵攻鎮江統制官舉城降居仁被執抑使降居仁曰得死報朝廷夫何憾竟不屈為所殺大軍至聞其死時語嘆噴之為棺使人護以還其家

至人皆異之鄉人為立祠

陶節夫

字子禮鄱陽人侃之裔舉進士累官知延平府以招降有功加集賢殿修撰築石堡等四

城得夏人害粟以千數銳意邊功累進樞密直學士後徙知洪州歷青秦二州後為待制知永

軍興

陶岳

祁陽人累官太常博士知端州余靖過端諸父老言前後刺史不求硯者惟包孝肅及公二人

歷年四十餘年五為郡守有文集行世

陶弼

字商翁祁陽人嘗學兵法能持論縱橫尤長于詩慶厯中提刑揚州被旨討湖南徭致弼幕下

用其策平之儂智高叛敗復辟弼參軍謀敗還朝曰吾平賊湖外所得者一陶弼而已嘗知賓

邑欽容辰順六州建中靖國編次勲臣弼亦預焉有書奏一十八卷

陶崇

字宗山全州人嘉泰中舉進士理宗在潛邸時崇為講讀官及即位被召首陳保業謹微慎獨

持久之說擢知信州卒贈特進諡文肅有漱齋文集

陶復亨

字仁叔新昌人咸淳乙丑試補國學元初克興國教授文行相稱有梅花百詠行於世

陶椿卿

字均壽定海人以禮經魁宋末癸酉鄉試覆試又魁父回孫登咸淳進士倅平江府而卒

廬墓終身元初被選舉力辭不起鄉邦異之

陶令

宋靖康間知盱眙縣徽宗南幸以南山有十景欲臨幸詔所在清道令辭以非決旬可辨上嘉

其直而止

元陶元幹

襄陽人淹貫經史嘗註易世稱為陶易

陶宗儀

字九成天台人博物洽聞明于處世至元間避地松江之亭林力耕以給食然雅好著述

雖在畝畝恒以筆硯自隨嘗預置一甕于樹間遇有所得輒書以投其中久之遂取次成帙名

曰南村輟耕錄行于世



明陶安

字主敬當塗人幼敏悟有大志元至正間授明道書院山長洪武初以迎車駕授左司員外郎

陞翰林學士又陞江西行中書省叅政臨終條陳二十事上之朝廷遣使祭于家子晟官至浙

江按察使

陶振

授學楊維禎所洪武初以三經義舉言詩則熹書則沈春秋則安國故諸生樂其近皆名陶生

學為掌故吳江久之坐法傳詣鍾官奏賦三篇多俚語俳調得釋復為掌故安化振才易近卑

俛為時格

陶鑄

字屋仲鄞縣人少孤貧獨儻不羈洪武間授監察御史正直不避權貴後以劾奏布政使薛大

方貪墨事偕召至京民為之詩曰陶使再來天有眼薛公不去地無皮已而果復任民皆喜躍

陶凱

字中立樂清人洪武中薦舉授翰林應奉歷官國子祭酒自稱耐久道人公應聘而起凡國家

稽古禮文事多公裁定詔令封冊歌頌時命公文章遂盛傳于世

陶成

字孔恩鬱林州人永樂中舉人授交趾鳳山典史歷任浙江兵備僉事處州葉宗留亂成督兵

遇害贈副使廕子

陶本

字培之少穎敏有志操師事族兄安博學洽聞為文渾灑而尤邃於理太平汪知府敦聘本為

府學訓導本以初脫征戎久荒經藝不就時高皇帝銳意儒術詔舉經明行修之士郡以本貢

至京師偕廬陵等處劉崧輩二十人入見上親御闕樓試以治平之策本落筆數千言言皆切

當稱旨即推工部主事居二年廉勤敦慎克舉其職超授四川行省理問卒于官

陶元素

字希文上元人正統間舉進士以親老乞歸養教授諸生不復仕時推重之

陶永淳

字質夫華亭人成化間進士任知縣心平政簡興學校崇節義當道交薦其賢能隣邑沙

河內邱民上狀爭欲為父母陞紹興府同知去民立碑以志遺愛

陶琰

字廷信絳州人成化進士授刑部主事仕至太子太保南京兵部尚書致仕卒贈少保謚恭介

琰宏才偉度累試繁劇恤國勤民勤著聲績中忤權貴屢進屢退自奉儉節人所不堪子滋正

德進士武選郎中論大禮謫戍

陶廉

曲靖人嘉靖進士任德清縣知縣嘗籍廢寺田四百畝給諸生康修濬楊灣塘以資灌溉陞刑

部主事士民慕之祀名宦

陶諧

字世和會稽人弘治進士改吉士授給事中遇事敢言首疏乞緝聖學以裨治道復疏言遠讒

佞戒逸遊斥權宦杖歸嘉靖改元起副使歷兵部右侍郎贈兵部尚書諡曰莊襄

陶銓

絳州人正統己丑進士授行人奉命至太原會中官王振亦至聲勢烜赫銓竟不往謁歷陝西叅議愷悌宏博有長者風繼乞致仕與諸里居者為九老延齡會夜有盜持炬入室見所有惟敗書舊衣竊嘆而去有司欲窮治銓曰彼以貧來值吾貧而去奚究焉

陶煦

浙江秀水人弘治庚戌登進士授江西永豐縣知縣歷應天溧水縣弘治丙辰擢監察御史正德庚午陞安慶府知府煦性靜而量洪喜怒不形大新學宮流賊滋蔓煦禦之以邊策而民不擾歷三載陞廣西按察司副使卒

陶照  
成化進士

陶儼  
弘治進士  
俱嘉興人

陶魯  
字自強  
以父成死事廕入監景泰初授新會縣丞陞知縣征黃蕭養有功陞按察僉事時高雷等府流賊攻劫擒斬賊惡奪回虜掠修築城池平後山隴水奉勅陞左叅政兼按察使歷湖廣政卒

陶欽夔  
彭澤人  
嘉靖進士  
弟欽皋嘉靖進士

陶大年  
字長卿  
會稽人  
嘉靖辛丑進士

陶大有  
字子謙  
會稽人  
嘉靖甲辰進士

陶大臨

字虞臣諱孫嘉靖丙辰進士第二授編修  
歷吏部左侍郎兼學士贈尚書謚文僖

毛

西河羽音周文王第九子封毛稱毛伯以國為氏又  
望出滎陽

周

毛伯過

毛伯得

周卿士

毛遂

自薦于平原君君曰賢士之處世若錐之處囊  
中其末立見遂曰使早得處囊中乃穎脫而出

與俱至楚定從而歸平原君曰毛先生一至楚  
使趙重九鼎大呂以三寸之舌強百萬之師乃

以為上客

漢

毛義

廬江人家貧以孝行稱南陽張奉往候之坐定  
而府檄適至以義為安陽令義捧檄而入喜動

顏色奉心薄之及母亡遂不仕奉曰往日之喜乃為親也

毛公

治詩趙人

毛萇

河間獻王博士註詩號毛詩行于世

毛亨

漢人作詩訓詁以授毛萇作小序故曰毛詩亨為大毛萇為小毛

三毛玠

字孝先陳留平邱人少為縣吏以清公稱後為國曹操東曹掾與崔瑗並典選所舉用皆清正之

士魏建國以為尚書僕射

毛遐

字鴻遠三原人為都督長史任俠有智謀世為豪右貲產巨億士流貧乏者多被賑濟至於月

供衣食粗敝而已齊孝武擢為驃騎大將軍

晉毛寶

字碩貞陽武人參溫嶠平南軍事破蘇峻有功為廬江太守終豫州刺史二子穆之安之竝知名

毛璩

字叔達西安人祖寶仕為廬江太守自寶至璩凡三葉俱擁節麾璩為安東將軍桓元篡位遣

使加散騎常侍璩不受傳檄遠近列元罪狀安帝反正進征西將軍

南毛鴻賓

避弟狀貌頗異氏羌見之者皆畏之明帝以為雍州刺史詔曰此以晝錦榮歸也

毛曾

與夏侯玄共坐人謂蒹葭倚玉樹

毛穆之

字憲祖寶之子果毅有父風為安西將軍庾翼參軍翼卒其將于瓚等作亂穆之討平之

又從平蜀有功封建安侯累遷益州刺史卒贈中將軍諡曰烈子珍嗣位至天門太守



毛安之

字仲祖穆之弟有武幹累拜游擊將軍孝武即位妖賊盧煥突入殿廷安之間難直入手

自奮擊既而兵集遂剿滅之遷右衛將軍卒贈光祿勳賜爵平都子子四潭嗣泰冠軍將軍

游擊將軍逋太傅主簿俱有名于時

毛爽

隋人受京房律法布管飛灰順月皆驗又每律生五音十二律為六十音因而六之為三百六

十音分直一歲之日以配其音

毛喜

字伯武陳宣帝即位除給事黃門侍郎兼中書舍人典軍國機密初宣帝委政于喜喜數有諫

爭事並見從自明徹相後帝深悔不用其言謂袁憲曰一不用喜計遂令至此由是益見親重

毛修之

字敬文官于洛陽魏人洛修之自調羊羹薦魏尚書以為絕味獻之太武大悅以為大官

令後封  
南郡公

唐毛炳

豐城人好學不能自給隨里人入廬山苟獲貲

鏹即市酒盡醉嘗醉于道旁有里首張谷掖之  
而起炳瞑目曰起予者謂誰對曰張谷也炳呵  
之曰毛炳不于於張谷張谷不學於毛炳醉者  
自醉醒者自醒醒醉之道兩者固殊安用掖為  
汝可速去無撓予卧由是人頗重之後聚生徒  
數十講誦於南臺山迨數年自署于齋壁云先  
生不在此千載只空山因大醉一夕卒有詩集  
世傳于

毛仁

魏縣人李文綱臨河人按唐書孝友傳並草野  
之人以孝弟通名朝廷者共若干人皆數世同

居天子旌表門閭賜粟州縣  
存問或復賦稅仁得與焉

毛一鶚

三衢人景德間來守吉州莅政清慎官滿家  
永新長子鏐領慶厯辛卯鄉舉授道州法曹

次子鏐中皇祐壬辰  
鄉試授江州判官

宋

毛仁厚

字及之開禧中與清獻公同發解于州其鄉  
舊有義役及之益緝而宏之編戶有田二三

頃者率不與脫遇警急勇往當之不以累役者  
歲或不登發義廩貸之窶甚者不責其償又率  
同志為愬于州縣請公廩賑之嘉定己亥歲大  
侵時及之已感末疾夢數萬蟻阻水引以竹乃  
得渡覺而言曰其殆饑也需我活耶乃力疾走  
州縣請粟即忤州將弗顧也先是家人憂其殆  
固止之則應曰饑民苟活吾死不憾矣用  
是疾加劇竟卒後十年清獻公為表其墓

毛漸

字正仲江山人第進士累官兩浙轉運使疏濬  
水患嘗帥涇原破夏人于沒烟進直龍圖閣知

滑州卒有詩文世譜  
及古三墳書傳世

毛晃

江山人閉門著書留意字  
學增註禮部韻傳于世

毛安興

洪雅人年九歲父死負土營墳廬于其側三  
年知益州張方平聞之遺以酒餼狀其事以

聞

毛維瞻

西安人以詩鳴與趙抃同邑相得為山林之  
樂元豐中出知筠州政平訟理時蘇轍謫筠

州監酒相與倡和有鳳  
山八詠山房即事十絕

毛洵

吉水人父應佐舉進士歷官太平州通判洵亦  
舉士又中拔萃科性至孝凡守四官再以親疾

解任執藥調膳及親卒荷土為墳廬墓所  
朝夕哭踊若初喪郡以孝聞賜其家粟帛

毛國華

字君玉為於潛令東坡捕蝗至其邑作詩戲之云詩翁憔悴老一官厭見首蒿堆青盤又

境如雲蝗自識人人不識蓋有德之士也對

毛溫

富川人仕為欽州靈山簿時交寇陷廉欽開三州守令遁走溫糾合土豪戰勝挫賊事聞召對

秩改

毛經

富川人仕為開封戶曹性敏悟一日方與客對奕尹以疑獄就質令罷奕經曰決事奕棋兩不

相妨呼二吏讀款目視棋局耳聽所讀已而奕勝而處事中理尹稱嘆薦之

毛滂

字澤民江山人元祐中蘇軾守杭州滂為法曹軾得其所為文深器重之後薦于朝擢知秀州

所著有東堂集十二卷

毛友

字達可西安人守鎮江時方臘殘睦歛監司不以實聞友奏言之時宰相朱勗怒其張皇遂與

宮觀友謝表曰兩郡生靈已罹非命一道使者猶謂無他陳瓘聞之曰蔽遮江淮沮遏賊勢斯

人有助也後為翰林學士

毛注

字聖遠西安人第進士官至侍御史凡抗十六章攻蔡京京罷未去國會星變注請謫京于外

己而星果退舍累遷諫議大夫

毛臬

字叔鎮江山人為歙州士曹方臘攻城陷官吏皆遁臬坐府中賊脅之使降不屈罵賊而死

妻錢氏扼其姑不忍去俱遇害事聞贈朝請郎

毛士毅

富川人仕為化州石城令李接反來攻城士毅與尉曰吾與君當以死衛百姓糾合義丁

與賊戰衆寡不敵遂罵賊而死高宗嘉其忠贈承事郎

毛昇

字新甫黃岩人歷興國軍教授遷改常平司準其長有欲獻羨餘四十萬者昇新力爭以

置社倉居官精密所著有能名

毛友誠

字伯明平江人初居縣市聞謝良佐高弟康叔臨傳程門學寓巴陵從之游謝棄科舉闔

戶讀書尤邃於易教誨誘後進不倦闕龔安國高其行誼即延至領泮宮幾十年闕端與仲晦高第教岳陽尤加敬禮有集曰玩易手抄既沒岳陽祠之泮宮

毛宏

字叔奇括蒼人大父通彥元祐間以經術詞賦三與計偕父徹有文行受詩學試為上舍優等

以久謁告不及貢居鄉以賢德稱與邑大夫交雖毫髮不干以私縣起新學徹治其事學成縣

令俾為之長以表率後進宏資稟不凡幼同兄  
宣俱有俊聲時目為二毛入太學繼試禮部以  
春秋輝天下宣中紹興第授  
寧海簿沈毅有守人莫敢犯

毛璞 瀘州人乾道中進士至利州路提點刑獄  
所著有六經解並三餘錄自號方山子

毛炳 富川人個儻不羈好讀書乾道中以平寇功授  
橫貴廉三州都巡檢使後交寇犯境死于難累  
贈太尉忠順武烈公二子  
維蕃維瞻並登進士第

毛直方 字靜可建安人宋咸淳中預薦入元授徒講  
學士爭趨之有聊復軒藁二十餘卷嘗編詩  
集羣玉府三十  
卷及詩學大成

毛附鳳 江山人宋室北遷益廣二王入閩取道江山元兵  
追急附鳳以義兵遏之二王得達閩而附鳳死焉



金毛仝

恩州人宣宗南渡率衆歸國署為義軍招宗遷蔡以仝為都尉圍城之戰仝力居多城破

自縊其子先仝戰死

明毛忠

字允誠蘭洲人國初以功歷封伏羌伯成化戊子土達滿四叛命忠討之與其孫鑑奮勇誓死

以戰竟死于陣討聞封子孫世襲

毛節

字伯尚武進人嗜書史工詩洪武間舉明經授監察御史

毛太

建文元年代王謙為左侍郎蹇義為右張統為尚書太文章政事皆優所與交者並中朝俊彥

北平兵起數上封事條方略純死太亦死

毛倫

字有倫鄆人日以談經論史為事洪武甲戌應薦入覲以母老乞侍養賜歸孝誠益篤母沒喪

葬如禮晚年與鄉先生陳中復烏斯道徐和仲  
優游半村之間以詩酒琴棋為樂倫為人慷慨

不事諛佞博古尚禮一時賢士大夫  
咸雅重之孫弘舉進士為給事中

毛肇宗

字克敬幼孤篤學居僧舍卒業三年不出戶  
永樂甲申登進士第時方重藩臣選吏部以

肇宗舉授周王府教授王嘗因封拜恩遣肇宗  
入謝既竣事出京上念肇宗有輔導功追召還

更賜酒饌以示殊寵肇宗喜吟  
詠寄興高遠有耶溪集二十卷

毛鉉

字鼎臣賦性方直生平無妄交風度曠視榮  
利邀如也善詩歌備漢魏以下諸體為文高簡

有古法洪武中以薦授國子  
學錄弟銳亦以文學著名

毛玘

字國珍任人天順甲辰進士授蒙陰知縣先是  
母久失明玘迎養官舍懇祈於天母目復明人

以為孝感在蒙陰有逋稅積數年不完徵玘召道者諭之寬其限卒獲完某叅政以均徭役至意有所需玘曰殘下媚上吾不為也叅政憾去遂解印歸

毛勝

其先幽薊人勝以父蔭宣德中為都指揮使正統以來累平賊寇歷陞左都督鎮守邊方進封

南寧伯卒  
賜葬祭

毛吉

字宗吉餘姚人景泰進士歷官廣東副使後賊反死難贈廣東按察使官其子科為國子生後

舉進士為  
提學副使

毛弘

字士廣鄞人幼穎敏有大志讀書至古忠烈事輒抵掌自負第天順丁丑進士授刑科給事中歷九載陞都給事中言論風旨慷慨激烈疏奏無虛日上厭苦之有昨日毛弘今日毛弘語云

成化三年值上元節預命詞臣分題作鰲山燈  
火詩欲以娛兩宮編修章懋黃仲昭檢討莊杲  
上疏極諫忤旨各廷杖謫外任弘乃抗言三人  
者出自草茅初居翰苑不顧一身敢言直諫真  
盛世事願乞復官而先是修撰羅倫亦以論李  
賢起復被貶弘言之益力謂倫不足惜而天下  
將以言為諱遂得旨四人俱復原官四年會懿  
懿皇太后崩廷臣議葬祔事不合弘乃言懿懿  
作先帝配為皇上母內外無失德葬宜祔裕陵  
主宜祔太廟為萬世不易定禮皇上生事兩宮  
如一今懿懿崩逝乃欲別葬是有二也皇太后  
不從當幾諫以合於道無使得罪於天下用是  
皇太后亦開悟竟得合葬如禮聲動宮闈皆呼  
為毛秀才太后欲識其面垂簾召見之凡在諫  
垣餘十年權姦落膽議者以方古之遺直同吏  
部侍郎葉盛考察南京官屬黜陟明當雖所親

不得一千以私會中  
寒疾暴卒人皆惜之

毛存誠

字守一直隸人景泰中鄉試中式成化初任南京山東道監察御史時有權貴人縱羣小

騙民金百兩上下和附欲假以寬貸不聽卒寘于法嘗監守皇城四門並光祿寺儲其有餘者合還於民而守衛官軍擅奪之悉按其罪中外聞之凜凜至今論南臺有風裁者必歸焉

毛泰

字時亨直隸人生而穎異九歲通經史稍長魁岸明爽言論諤諤年十九領鄉薦登成化己丑

科進士初任南京刑部主事改北京戶部員外郎嘗分司居庸闕玉田奸民郭剛等詐投荒田三十餘頃供俸延福宮香火奉命往勘皆民產也延福宮乃太后所建同事者懼欲有阿堅執不從據實以聞抵罪尋陞知四川重慶府到郡值大旱竭力賑救全活者數十萬人旱後疫作

設醫療視全活亦衆弘治甲寅貴州苗亂巡撫者移督軍饒捷奏有彩霞寶鈔之賜改鎮遠蠻

夷悅服逾年致政歸田

毛瑄

直隸人成化進士

毛紀

字維之山東掖縣人成化進士改吉士授編修仕至吏部尚書謹身殿大學士致仕贈太保謚文簡子渠進士槃舉人

毛澄

字憲清崑山人弘治進士第一授修撰仕至禮部尚書加太子太傅致仕贈少保謚文簡澄心術平夷學識諄正狀貌抑抑謙恭至是非義利禍福確乎不可拔也

毛憲

直隸人正德進士歷官都給事中質直勵飭修文勉敬義篤于宗姻戚故人以是多孚服居諫

垣叅劾

劉激

毛伯溫

字汝厲吉水人正德戊辰進士御史巡按福建與鎮守太監相左有能名嘉靖中議征安

南俾任其事不勞兵刃默定僭亂歷官太子太保兵部尚書

毛鳳韶

字瑞成麻城人正德辛巳進士授浦江知縣有善政擢監察御史上弭災八事疏詳具皇

明疏議輯略有大有大者如復舊制以革鎮守此尤關于天下利害之最切者巡按陝西雲南守令以下皆望風解印綬去班列殆空尋謫嘉定州判官歷陞推官同知終雲南僉事博學有文名有聚峯文集藏于家

毛愷

字達和江山人嘉靖乙未進士初授御史直聲聞天下言事忤旨謫寧國節推己酉歲由工部

正郎守鄖陽一清如水自奉甚淡薄涵養深粹  
喜怒不形常進諸生講繹文義時缺督稅官公  
立限躬徵不踰月而集撫按曾刻名以勵各郡  
又事母至孝親疾輒泣禱弗解衣辛亥秋被命  
更寧國行李蕭然母卒衢城幾無為殮瑞郡僚  
屬遠道馳奠悉反賻金時人有孝過黔婁廉方  
伯起之譽云後歷官至刑部  
尚書伉直執法為時名臣

毛衢

字大亨吳江人嘉靖二年由進士明敏有治才  
莅任之初悉心民事先是市豪類包攬里徭二  
役侵漁都鄙一切革去之進田野小民服役公  
庭教以禮法民懽悅甚迂浦街有金星菩薩閣  
橫湖堂亦有神祠祠主歲斂民金錢為穿臂會  
云能消災致福遠近赴者如歸市君毀其閣若  
祠曳神像火之罪主者數人其害乃息尤重學  
校禮遇諸生以治繁調建康後陞刑部主事歷



員外郎四川  
按察司副使

毛綱

字伯鍊蘇州人嘉靖癸丑進士歷右僉都御史

毛起

字潛濱夬江人嘉靖丁未進士由庶吉士謫外歷蘇州知府有文名人稱青城先生

勞

武陽徵音其先居東海勞山因氏焉人望出渤海

周勞霸

晉三公郎

漢勞丙

琅邪人

三國勞彥遠

尚書左丞

宋

勞原誠

崇德教諭

勞謹

任城人真宗時為京東轉運使萊陽產銀砂民有私採者事露安撫使欲論以劫盜謹曰山澤

之利人得有所盜者豈民財耶貸免甚衆

明

勞謙

錢塘人洪武舉人

勞士寬

南海人刑部主事

勞玘

字汝明為戶科給事中立朝侃侃遇事敢言不避忌諱嘗以直諫忤上被責不少挫以疾卒于

家年五十五

勞鉞

字廷器德化人由進士任應天江浦知縣轉臨清山陽俱有政聲成化中陞太僕寺丞復陞浙

江湖州知府子惠庶民澤潤千里卒于官湖人立廟祀之

勞樟

崇德人嘉靖中知羅田縣適地方凋敝之後樟身親會計稽賦釐姦新學廟葺城池確然直行

己志去之日百姓號泣載道尋立碑識其遺愛焉

勞濟

字本仁德化人知府鉞之子也自幼穎敏長而苦學如閩如浙皆負笈從游通五經尤長於詩年四十二始舉鄉薦教人以存心不欺為主江州士夫多出其門卒年五十人皆惜其道之未達也

勞紹科

番禺人嘉靖進士

勞傅相

德化人嘉靖中任湖州府同知

勞堪

德化人嘉靖丙辰進士萬厯間浙江左布政使

教 譙國宮音顯項師大教之後以為氏

晉 教仙

晉人即教真人

宋

教陶孫

字器之號曜菴懷才挾氣嘗有詩云蟠胃二萬卷落筆五千言宋寧宗朝進士及第慶元

中韓侂胄用事貶趙忠定于永陶孫時處上庠以詩哭之云狼胡無地歸姬旦魚腹終天痛屈

原侂胄惡之編管嶺南作詩評一章自魏晉至唐詩人皆有品題一

教仲實

號且齋萬載人延祐間知新昌州有聲修羣賢祠增祀知縣寧麟狀元姚勉各為讚

教知言

朝散郎大觀中知南安軍

教經武

吉水人紹興進士

元教繼翁

字君壽福州人寓居湖州遂通經術動循禮法元趙孟頫師事之平章高顯卿薦于朝授

信州教授命下而卒所著有儀禮集說

明教和高

高安人天順進士

教山

字靜之山東莘縣人成化進士弘治六年以翰林編修任山西提學副使性資剛毅學問淵深誠心愛士直道事人所著有石稜傳燦然稿先天手冊晚歲尤精於數學

教毓元

江西人成化進士星變言時政謫邊方縣丞

教翔

金堂人初知宜城正德初以才堪治繁調知江陵廉以守己勤以莅事百廢具興而民不告勞

郡稱循吏

教英

字子發清江人正德辛巳進士由南刑部歷陝西河南提學副使歷江西右布政使工詩興幽

思遠盡絕蹊徑起悟上乘足稱名家

教銑

字純之高安人嘉靖進士歷官禮部右侍郎

教鉞

高安人由舉人嘉靖三年知潛江縣果敢任事強畏弱懷而開河築堤尤加意于水患

皋

廣陵皋陶氏之後

周

皋如

越大夫勸勾踐伐吳

皋魚

關

漢

皋誨

司徒長史

皋弘

字秦卿吳郡人家代為冠族少有英才與桓榮相善為議郎子徵司徒長史

皋伯通

吳人為郡之大家有賢行梁鴻與妻孟光至吳舍伯通家為人賃舂光每具食舉案齊眉

伯通察而異之曰彼傭能使其妻敬之如此非凡人也乃舍之于家以賓禮重之如

明

皋玉

清河人弘治中山西稷山教諭

牢

琴牢之後以王父名為氏

周牢成

晉戎右

漢

牢梁

中書僕射石顯黨

牢邨

儒林傳

牢慎

蒿

羽音見姓苑

明蒿賓

字大賓滕縣人  
嘉靖戊戌進士

樛音交見直音

周

樛留

韓大夫

桃望出山陽見姓苑

周

桃應

孟子時人

晉

桃豹

石勒將



操 見姓苑

漢 操乘 見印

南 操天成 鄱陽人舉兵征隋

宋 操斗祥 浮梁人淳祐進士

明 操安 浮梁人正統進士任御史

操欽 宣德間推官廉以律已明所以治訟豪強畏威細民感德尋薦為監察御史所至巡歷卓然風裁

能聲益著

操私 浮梁人正德中任松溪縣訓導以薦陞工部主事

操洪

臨川人成化舉人

操守經

浮梁人嘉靖進士任給事中

操時賢

浮梁人嘉靖進士

操瑄

潛山人嘉靖中四川合州判官

糟

明糟士奇

鳳翔人嘉靖舉人

漕才到切

漢漕仲叔

游俠傳漕仲叔有謙退之風注漕姓也

豪

宋

豪彦

乾道進士  
儀龍人

明

豪英

潁川人  
天順中  
宜都縣知縣

毫

漢

毫康

甘陵人  
女弟為桓  
帝后封安陽侯

褒

姒姓之國  
禹之後也  
周幽王后褒姒以為氏

羔

見姓苑

咎

韻會云姓也  
通作臯  
咎繇舜臣書作臯陶

髦 史記殷後有髦氏又見姓苑

檣 見姓苑

縹 見姓苑

蓐 蓐收之後

號 見姓苑

萬姓統譜卷三十三